

四庫全書

集部

欽定四庫全書

東洲初稿卷十二

明 夏良勝 撰

仕止隨錄

南歸

有感五首

國士悲難遇，憐才既有年。
懸腰多白玉，舉首見青天。
五位遙當極，六龍時待邊。
秋旻上飛翮，誰許附孤鶩。

朔漠收遺鏃宮門懸腐狼君臣元自性富貴詎相望武
畧休傳箭文明合正裳高岡亂鳴鳳應不待朝陽

聖明六合御苦樂一人均頻有江淮報難迴天地春親
忍死相食望窮生及新至尊憂惻意前席幾廷臣

軟草忌先翦孤根甘後凋不將忠悃報真負聖明朝丹
極龍旗動千官萬里遙經年欲忘味豈盡為聞韶

石虎射羽沒驚鳥落丸疑月氏報何急雲臺功尚遲輯
瑞思彝典越裳勞譯詞生全臣子願筮卜見明夷

與國裳太史汝信儀曹初議入疏

昔年賓宴為兄弟此日鳴珂總帝臣
筆舌果回天地力肝腸初對簡編親
夢陪鐵漢無沾背坐宥金人合致身
獨使鑿輿隨去住瘠肥安忍視孤秦

惟濬太常見訪相期預疏

隣郡有佳士朝紳推俊人
春風坐歲月秋水賦形神
孤危標節槩開濟抱經綸
朽腐何堪仗幽懷憶遠巡

草疏有懷

郎署年來衰颯多身謀無奈國憂何
篝燈細讀治安策
擲筆難追正氣歌
須信朝廷符泰運
未應網紀付頽波
一函封事千行淚
願徹宸梳乙覽過

諫南巡疏

奏為懇留聖駕事
近日臣伏聞傳奉聖旨將欲南巡
內外大小臣工皇惑莫知所措
咸謂功每忽於垂成
倖不可以再恃
陛下往歲巡邊京師震懼
邊境繹騷
近幸回鑾稱慶
無地今復再議南巡
意外之慮有臣子不忍言

者是以內閣九卿及科道等官瀝誠摠忠伏闕上疏仰
祈聖明必見開納然猶未奉明旨處分豈以豐屋之下
壅不以聞抑以逆耳之言苦於難入臣義均犬馬心益
驚疑方今東南之禍不獨江淮西北之憂近在輦轂廟
祀之塋位不可以久虛聖母之孝養不可以恒曠宮壺
之孕祥尚可以早圖機務之繁重未可以盡委師臣之
號傳聞海內恐生覬覦之階家將之屬納于禁近詎忘
鄰敵之患此臣子所以痛心疾首而憂宗社安危在此

一舉之意也如蒙皇上端居深念俯納羣議遂輟此行庶足以明彰聖度鎮安人心守祖宗之重器杜姦宄之邪謀若以成命難回巡遊不已臣實不知其死所矣

疏入待罪

聖明元有度獻納本無司巡幸遲奔駿疎狂泣抱縈中朝多汲孺遠使壯吳咨天網恢恢濶蟲魚安所私

闕廷得旨下獄

天王守萬國安忍棄長城偶挨龍鱗怒誰沾骨鯁名世

情三語好公議百年清卻憶小冠勝囊頭獨抱經

得大理諸公消息

狂狷重重荷校徒忽傳天語下金吾東都善類網常寄
北寺官曹法網疎養士功深才末見捐軀義重偶同途
誰云世事應如博盡付輸贏與雉盧

伏闕待罪

日影朦朧氣尚寒累累蓬垢舊裳冠楚人安敢悲歌淚
鄭子應須入畫看簡冊竒踪曾幾見古今人士更多般

也知主怒臣當死碧血萋萋草未乾

工部三君暨諸大行下獄

彤庭冉冉見飛塵列校謹收釁鼓臣皇甫見遺因自疏
翠華頻動敢全身衣冠未信有今日顏面何妨見古人
共祝聖恩寬似海孤纍他日盡王賓

國裳太史得調

制科推首選共喜得真儒主聖臣斯直名高跡自孤周
星連䟽上忠悃孝情都楚水閩山隔一峯開畏途

張選曹得調

上書出選部分麾，倅晉陽九重共治理。
千里布麻桑菜，子方成綵舍人行。
促裝禁中頗牧，問歸珮更瑤瑤。

獄中即事十首

往昔玉蒼佩，委蛇金水橋。
詎知牢畫地，能過氣干霄。
困鹿寧忘擬放豚，甘伏招君門才咫尺。
北望日搖搖。

有好伴自適，無他慮更清。
夜燈猜息鼠，春夢喚遷鶯。
未信家遺狗，何妨魚作羹。
悲風回首淚，老馬指迷行。

兀兀坐忘繫者者數遍支敢祈得死所重念放生遲扈
從留黃屋犁鋤認紫微天門持節使早晚輔臣知

椿老雨鳴葉桃殘風逐花孤懷渾為主好信不來家漢
獄書方受秦臺鏡已遮滄洲綸釣在隨處有生涯

簪笏心逾遠山林跡已開獨醒今日是嚴譴古人來白
馬幾成讖蒼龍覺有媒昨宵雷雨過踏徑見生苔

障屋方流雨決渠成引泉塵埃才一淨憂惻念多賢獄
吏還堪對傳更不廢眠栝孟盡知己相向亦淒然

貪睡朝昏易高談齒頰香過憂移造物深咎付滄浪名
士中朝盛狂言記室藏矢書問耆舊天地幾茫茫

周發不恤緯趙士歸澠池惠文灰赤心汗竹羞青藜豈
欲外死生恐負為男兒嗟哉直士行駢首空踟躕

扃嚴妨對月衣沈似沾雲賈疏方年少韓忠豈掩文觀
奕日較健敲詩夜幾分攬衣更推枕岐路泣紛紛

有見只如此無功曾奈何異時知計晚吾榜得人多漢
詔應懷草殷都漸止詔南山堪種作牛背白雲歌

寄東山家兄

不見家兄才一年喜得家兄十數書邇來夢寐生顏色
各願異世還同居兄當家政密綜理弟許國事慚空踈
連床有賦恐斷絕重繫莫遣徒嗟吁雞聲濺淚忽起舞
肉食愧恧思棄餘兄知慰勞若滂母弟欲訓誡愁無兒
皇天無私明主悟烟然聯璧光庭除人道吾家弟兄好
異時不別為龍豬

鄉友從事金吾數輩勞問頻頻詩以志義兼自

慰云

此地偶相識有懷如舊遊
公庭私案草家問置書郵同
難重許可吾鄉多義流
追惟京兆尹陰語更何譬

示家屬二首

倏別已經歲重來方再旬
孤危違耦數禍難見同屯
過眼貽長恨捫心薄大倫
何當更相守衰瘦各逡巡

一年兩疏輕身禍友義君恩
為道憂自分擔當丈夫事
久嫌謀議婦人流病癯未厭
當壚酒薄力還堪理釣舟

聞道天恩貸愚直更闌燭影問淹留

喜雨

春盡苦不雨夜來牆覆雲燕斜迷舊幕鴉濕坐高椿百
種隨地入萬家饑色分潢流入枕盡明發看消痕

觀奕感懷

象戲古為樂牢愁今暫開寸心紛巧拙對面別形骸國
手須忘鵠窮途卻咎騅解圍思謝女腸斷重徘徊

觀宣和譜有感

漠漠黃塵瘞玉顏尚遺宮具在人間乾坤有意留昭鑿
南北中分只等閑朱墨幾斑成劇戲鑿與萬里憶生還
臨場快賭真孤注誰敢提兵向玉關

高椿

老樹摩空立者看入眼青摘芽供茗盃當徑失茅亭古
井汲分潤新巢鵲布靈何心占凶吉翻助短長吟

贈徐器之以醫諫者

拭目云已久恨晚得君奇異流偶同趣乍識為相知工

藝古司諫肥瘠今名醫死禍幸生逢秉燭論心期

贈張揮使英以死諫者

不見安金藏于今幾代年大君從諫聖武士憤時賢折
首甘歸獄畏屍猶自邊何人當信史莫讓野夫先

追哭劉忠愍公

詔獄銷魂折壯心先賢故步若相尋金吾署案承權倖
玉輦蒙塵恨古今故事頻來人口角生顏如見夜凌侵
不才負譴猶深重後命難占且正襟

追哭鍾侍御公

安危欲附綺黃流，抗疏驚人死便休。
百杖果從龍子去，

三朝應見茂陵求。

自英宗至孝宗，猶
思及妻子故云。

崇班終有故人到。

謂張儀部

好樣真為鄉曲留，自是達觀安義命。
吾曹端恐愧

前修

作家書述懷

織管長檄淡墨書，半生踪跡此留餘。
元城豈是無先見，田舍何緣悔後誅。
卓犖大兄宗祏任，飄零骨肉死生殊。

坐堂共惜千金子通籍先捐七尺軀

作衣帶語有感

早結文山夙世盟偶收遺札十周星

初得舉上京一寤
難人持文山處難

真筆家問見
售竟成識云

君威信與雷霆重臣節難通廟社靈箕顛

有人忘盛治忠良無我占浮名心詞構就藏衣帶地下
相從質舊情

闕下臨刑即事

力士如林夾道趨行人灑淚濕襟裾
讜言聊慶今多士

受諫竒逢古聖徂班尾舊行為死所仗頭新樣或生渠
腸肝似鐵喋無語骸骨誰收封楚墟

幸生

杖下孤臣計可全聖君恩重骨頭鑄衰顏斷送机邊肉
親舊交期地及泉嬰禍狗名非得策移忠於孝本微權
日來有報南巡輟飽飯酣歌未死年

謝恩即事一首

扶傷駢伏舊班聯歷歷清流事眼前氣息尚存咸主德

髮膚何敢謂天全
黃山此後無先轍
丹極于今宥往愆
下有巢由堯舜治
放臣白氈老江邊

病中遣懷十二首

近朝蓬屋類村居
簪笏羈維得解初
裹藥醫瘡日方永
奄奄殘喘釜中魚

少年夢境即神州
飛步元龍百尺樓
今日宦情成嚼蠟
不禁清淚杞人憂

有生何幸登清要
得死無妨失首丘
昨已裹瘡拜歸命

楚江煙雨問瓜州

旋製衣冠彷彿古踪江湖蕭散正秋風
蘆花淺水真堪畫
天人孤舟一放翁

直弦鈞曲任相非來往憧憧總不疑
東部寧無佛骨疏
商顏堪聽紫薇詩

江南歸興亦悠然短棹長繩放酒船
白筴青蒲堪入饌
故人為辦買山錢

小謝頻驚池草夢大蘇方憶對床吟
經旬卧病空皮骨

萬里羈栖一片心

君王動定付疑丞
春雨龍池盡甲兵
莫咎才疎先痛哭
會看深夜問蒼生

羽獵諫書今寂寞
巡遊別殿古長安
病深司馬才應澁
未信穹碑入史刊

代馬依風越鳥枝
何人進退獨逶迤
聖君恩重親慈念
我輩無才恨放遲

老郎未必如顏蹇
碎首應知似楚非
落日扁舟鴈聲過

南風江上草離披

入官年紀已休官一節于今似苟完許大乾坤男子事
風波滿眼路漫漫

哭何水部孟循

哭有後期痛情因共難深高名收漢史清淚憶南音空
約來孤棹無緣坐茂林許身君足矣猿嘯為哀吟

哭陸駕部汝亭年兄二首

愧我迂疎見多君慷慨詞十年論契誼並疏許匡時李

杜期完節機雲入調詩同愆不同死造化豈愚私

伏枕驚奔赴悲啼不裹頭病衰雙鬢短身世一漚浮節
槩三生會江湖半夜秋鶴山封宿草倚劍莫雲留

謝別相知諸友

論交因寡更多賢細語高燈幾膝前夾日飛龍切雲漢
乘風孤鴈唳秋天江南活計萼羹好極北勲名畫閣連
禍難情親車蓋盛東都圖影未須傳

病中故吏候問踵至行時跽送通衢禮出常格

有垂涕不忍去余者詩以志之

官曹御史恒威嚴好惡有性非人遷問僕安否匡床前
追班跼候周道邊情先親舊輸恭虔跡駭都市收沔漣
愧予德薄叢謗愆高若義重殊留連過牆蜂蝶今紛然
翟公門下誰為賢

通州道中

世事每如此吾徒安足嗟殘軀便掬鼻歸路較來賒識
燕隨飛亂飄鳧倒影斜滄浪吾道在倚玉並蒹葭

國裳
汝信

同行
故云

午日登舟

天涯逐客此行舟
細翦新蒲綠酒浮蠶室
餘生堪記漢
狼胡負謗敢忘周
輕鷗幾點迎迴棹
饑鷺群飛過柁樓
望盡白雲家定在
一聲漁笛楚江秋

河西務遇沈侍御子公辱贈以詩答和一首

朽瘠未能忘帝降
草茅何敢負王臣
青山有分常為主
黃鳥忘歌百贖身
諫草夜焚祈削迹
畫龍點墨助生神

蓬窻坐對寒酸侶林下相從總故人

汝信惟濬家相去才百里又雅好也

過平原得余伯獻訃痛悼一首

性忠盡道等烏玄厄會爭傳新鬼冤病思筆荒追楚些

孤帆面指見平原鄉邦更失此前輩道路知君無後言

相傳訣時無他語予又知其在此獄無異詞也

我與同年更同難東島何日到

封門

訪顏太師遺跡

才名歸老守妙畧炳先幾舐血仇番將戴頭來賊圍九

重頻問狀一死果如歸長寄英雄恨寒鴉與落暉

訪東方朔像贊碑

使節骨能斷筆鋒碑不埋信如唐叔季莫起漢詆諧歎
玉能超磧偷桃未委骸輪臺應召尔哀痛慰深懷

臨清閻吉士贈詩和答一首

俊义明章會泰期癯如山澤正需時暫逃死禍逢君聖
未信真休去國遲南服望回青野合西江作伴白雲宜
高人雪調悲漁父一任紉蘭與佩離

舟次吳奉常先生惠酒

篷箬炎蒸裏，奔波變幻中。
悶從間更劇，詩每醉為工。
一甕吳兒抱，行書長者通。
入唇先飲德，孤笑海濤風。

得輟南巡消息志喜一首

江南歸興引廊廟，去憂長傳得真消息。
猶疑近渺茫，選駿今閑冀。
傷歌已悟康，逐臣雲卧穩。
魂夢到柴桑。

瀛海道中王侍御補之地主禮為備沈侍御子
公贈言而直程侍御時言聯舟招飲款曲獨至

竊自慰吾輩未為君子棄也賦一章

放脚窮途未應哭入眼高士殊憐才過雲壯節快一覩

觀風義聞歸兩臺

王程北臺沈南臺也故云

酣飲放歌同格調迎來

送往無驚猜山水興高子期衆伯牙何必為琴災

夾溝道中與熊侍御尚弼夜敘并贈以詩和答

一首

勞生未了非經國逆旅相看正憶君飄泊乾坤罷巡幸
山林枯槁委華芬憂來細共移床語得去初焚絕命文

翦燭拔餘深盞酌滿天風雨暗愁雲

時風雨大作故云

沛縣追和楊文貞公弔顏令父子死節一首

官當百里寄安危危不堪支死便隨克靖縱符真主歷
與亡自分守臣知道傍有識悲橋梓地下相逢愧友師

顏令文貞公友也

宣是忠靈昭裔祚平原異傳合同垂

顏又真卿後也

呂梁觀物亭為陳水部賦

行窩故安樂繞砌屯春雲意象動靜間淺深時敘分水
部留何遜山陰來右軍性靈先典要挾皆空紛紜

一鑑亭詩序

詩附

正德己卯夏六月四日東洲夏子偕梓溪舒子五谿萬子辰渡淮瀆若安流也因感子方呼酒聽歌景象于今似太幸矣適陳水部頰倉曹比節見訪舟中且強以半晌為醜會水部主席行署方開亭池上顏以一鑑倉曹曰吾署有寄寄亭名天下以匏庵之書西涯之詩篁墩之文爾也茲亭之成而三君子至而落之無亦非偶然已乎於是水部具楮墨索律嚴甚各勉承之嗚呼茲亭

華構視寄寄何多讓顧疎愚放逐望先輩之涯溪不可
得已敢曰相先後為淮瀆清曹兩亭輕重也哉第他日
登亭追考先德有及孤累往迹焉則曰時有順逆事有
難易士之有榮辱進退感慨或繫之矣

開亭放活水野色淨無垠會我物即理于今地重人落
落亦自合寄寄堪為倫靜得者誰子分尊許共巡

寶應道中喜惟濬太常舟至

君病別亦久我行思正長好風度淮海鄉語接舟航對

哭仍王傅悲歌見子方轉蓬銷客恨燭影獨煌煌

召伯鎮得子重憲副寄詩和答一首

十年京國論知己千里檝詩問逐臣蜀道艱關君叱馭

江湖蕭散我容身兵戈喪亂須長策

時蜀方用兵多敗衄故云

爛熳

詩篇更有神何處相知夜深語莫悲幽側已多人

辛未歲過范光湖值風變十餘舟俱覆余舟獨

全因作數語告湖神即矢許國之義茲又幸生

過此風恬浪淨瞬息抵岸而風雨又變意者神

故有知顯示逆順且旌余之不負初言也詩以

志感

不將軀殼委蛟鼉天與吾皇耀士多滿紙丹心藏水國
一時清議比黃河蕭條行李沉香浦零落衣冠鴻鵠歌
迎面波光勝看鏡山林風骨未銷磨

揚州追問文山楊子灣故事

楊子灣頭樹悲風萬感增有君寧易死棄國敢偷生卧
糞晨無飯隨樵夜聽更寸心真萬斷愁結海雲橫

文山至海

州西能脫禍痛
定思痛時也

過京口家僮至喜得家書

忽傳訊問到蓬窻
恠爾悲啼更瘦黃
聞道江湖盡豺虎
已拚生死寄舟航
親知見面畫多夢
書札論心夜幾行
莫異邊方矜阿段
楚歌吳曲轉淒涼

露筋廟

婉婉淑媛靈一死
百代觀無亦陰靜
資迺爾陽剛完血
肉委塵土筋骨呈
琅玕彼蚋嘍何毒
若婦心空寒人物

自異賦善惡形兩端廟貌照湖光樹石中巔岿

淮浦追和唐子方韻

瑞世為麟鳳清時入網羅正君歸輔弼去國任奔波風
浪喜初息江湖憂亦多漁郎不知姓擊楫幾人歌

邃翁遇以殊禮而贈之詩和謝一首

五雲深處是君門休戚頻頻繞夢魂鐵甕城高留故老
金山月到伴黃昏似更人世新知已共望天回稱主恩
尊酒能忘操杖屨幾千年事一時論

夜過毘陵懷古

鬱鬱陰房照熐青舟人指點問軍營松園巡遠雙忠廟
柝警睢陽百戰城勝敗豈教能逆覩丈夫何意徼完名
只緣共濟艱難日恐負人臣一字盟

吳郡學名宦祠謁告先大夫文

切惟古之父母斯民者謂愛之如子則子之愛固有先
於民者也古之事君資於事父則事君不忠非孝其親
者也大夫佐治吳郡者三年去而沒者十餘年吳人德

之思之而祀之若桐鄉之阡是大夫之愛或先於不肖而不肖於大夫固不若吳人然況忠不足以悟主誠不足以格天扶傷救死迺獲請命于斯几筵曰忠曰孝一莫從旃天高地厚孰隱于愆此所以愧悔欲死而不敢以成禮見焉嗚呼大夫之子則衆矣大夫之享禮祀則永矣不肖其何圖以不墜大夫之氏又何以稱于天下曰象大夫之賢大夫其愛弗數于前鑿斯方心而規于圓俾其終老于丘于園亦庶乎大夫之澤之延謹告

謁武穆祠

丈夫有死丘山重和議才成國步傷
紫塞茫茫迷輦迹
丹心耿耿落湖光
春秋半部惟權變
夷夏一家誰紀綱
欲起忠魂銷永恨
棲霞山雨淚相將

謁肅愍祠

乾坤自合留奇士
廟社云何沒駿功
身禍也知天未定
國恩追到祀方隆
由來寵利戒履滿
卻怪英雄幾令終
鬱鬱孤丘真對待
岳墳蕭瑟樹高風

登中峯和陽明山人二首

客裏有懷風土好眼中無障畫圖開一江煙影孤帆過
半夜潮聲送月來松閣迴颺自鐘磬竹泉分雨淨飛埃
山僧也欲窮幽勝踏遍繡經最上臺

暮倚層厓候落曛翩翩歸鳥亂聲聞帽歌驚見隨濤雪
履薄曾穿絕嶠雲坡韻謫來收越勝伍曠還去看吳門
須知大義無通塞嘲怨何心卻費文

登道山亭

高亭望天際，隱見吳山吟。氣浮湖海暝，坐上風雲深。乾
坤留異境，聖賢存道心。舊遊獨傷懷，城頭聽暮砧。

錫山謁二泉先生不遇

惠山入雲望，縹緲泉翁高。佳嗽寒泉肺，塵有意分餘滴。
餐玉無方恨，少緣汲涉橫。經思見晚門，生宦轍得歸先。
盱江江上柴桑古，斜日林丘亦穩眠。

訪邵思抑月夜論別

塘棲水涯有名士，野鶴玉立依亭臯。看花相識過十稔。

折柳論別今幾遭
月露坐深惜光景
冠裳未必俱蓬蒿
我行歸矣君應出
撐持六極需鯨鼈

西湖懷古二首

山黛倚障立水光浮鏡開
菰蓴根有托鷗鷺影俱來
歌曲空遺調傾危且覆杯
混茫接疏鑿刻畫付詩裁

壯遊元有分歸思浩無邊
賃屋當佳地撐舟入小天
長堤存謫吏孤岫問逋仙
擬卜東隣住殘書不值錢

桐江二首

百谷會陰壑長風生海門處士有高致天子畧常尊煙
艇繫旋鳥雲蘿下飲猿歸舟信輕穩晚泊向孤村

煌煌炳御座史占客星臨盛世高臣節微時識友心絲
引江鄉重人非草木深層臺勝風閣自語對山禽

歸矣行

君不見雲中鴈啄飲隨陽倏聚散安得似水中鷗鷺忘
機幻浪飛翻還泛泛野人空自有心丹百試不效增顏
顏攜囊歸去恨不蚤麻姑酒熟山花好

屏跡

歸路阻更長屏跡病且卧衝暑潞河來乘風越山過獨
酌瓶未空飄鳥網中墮呼童索紙筆日暮了詩課

嚴先生祠二首和東岡僉憲韻

斷石封雲開別界桐江落日照高祠不緣清節鼎堪繫
安得名家舟定維才並兩生虛禮樂道宜一世與推移
蚤將末契看鷗浴心性滄浪為破疑

幕谷懸蘿與德滋誅茅有分寄遐思朝儀南越來黃蠶

士氣東都見赤旗鳴瀨翻江驚象石迴瀾絕壁見雲堤
果然六月驅炎吏會有清風生兩涯

嚴衢道中苦熱三首

乘舸歷吳越氣息如縷無六月全經伏三更少望蘓舊
賜篋留扇本懷家近菰甫田憂命吏合樂正交雩

煙柱苦不熄障雲時復來江波見白入蠅螺望青迴陰
雪失寒玉颼風蕩殷雷楚臺何處是徙倚一襟開

漢署香初遠江鱸味正新枯腸淪茗較流汗澣衣頻白

屋先容我青門後望人秋來家已近揮羽岸綸巾

蘭谿謁楓山老先生

今年盡夏去年春兩入楓山納履塵天地有心遺大老
經綸得策屬何人拜床風格追先輩荒徑雲深擬後身
翹首斗南高莫並夜燈疎雨對蒼旻

江山道中宿王生館以譖牒索題詩以應之

艱危固貞旅岩谷見名宗展牒思留犢瞻槐來遠風有
穗存舊物無市問新豐越水連閩嶠孤臣合寄踪

過悽惶嶺

秋風瑟瑟動閩山天放孤臣取道還定痛固知身謝累
幸生空念國方艱愁深今日悽惶嶺迹比前人皇恐灘
望斷白雲家幾許可無湘子到藍關

浦城道中宿人和公館見一川孫中丞有詠和
而哭之

掃壁看題字淒涼舊紀行雨林如我淚風澗泣君聲外
戶驚蛇斃前驅聽鶻鳴路人如有恨莫道本無情

誰遣蒼龍使人非白鷺
洲乾坤生氣在節槩
死芳流孤岫晴嵐碍
新秋太白浮海濤如許
闊我已辦歸舟

清湖七夕

踴跡今宵盡越山
相將骨肉共危艱
團圞信意風歌蓋
巧拙驚時月掩鬢
蟾網漫張書未曝
鵲橋何處駕應還
方圓齟齬休饒笑
明日僊霞曉度關

九牧鋪次黃後峰
壁間韻鋪因見素
先人而名翠渠大
書尚在也

地本因人重先應待後名伶傳詫郵卒我亦繼君行

建陽道中追和晦翁武夷雜詠

武夷精舍

處處天地寬勞勞真過客望見山上雲欲煮山中石

仁智堂

拄杖突兀山洗瓢清冷水仁智各有資出門即萬里

隱求齋

千崖雨澗深萬壑風林響高卧南牕人默契此消長

止宿寮

鑿石開畏途，誅茅覆殘宇。莫使後來人，秋風見禾黍。

石門塢

靜學自有得，入山憂不深。重雲關石門，獨繫遊人心。

觀善齋

一脉道統尊，方丈客布席。我來廢病餘，拾級嗟無力。

寒栖館

勺泉思澆心，盂飯更努力。兀坐者誰子，遂寇須空壁。

晚對亭

我聞廬山岑五老堪獨對杖藜御晚風破此孤亭翠

鐵笛亭

壯懷隨地好異境逐人開鐵笛誰留在風濤天外來

釣磯

長把百丈竿舞弄一江碧終焉變形聲恐為丹青識

茶竈

溪石上兀兀溪流正泱泱科臼卻自別時分山茗香

漁艇

礙雲檣更短載嶽棹全輕衣帶限千里停篙聽問聲

謁考亭書院

宗賢闕里獨相尋望裏雲屏紫翠岑覆屋孤松開曉暝
釣溪漁父識南音山川有待為增勝俯仰無慚信爾臨
函丈衣冠儼遺像一潭寒碧萬年心

邵武道中懷古

夏日信可畏行路須遲遲感時方鬱蒸遇變殊增悲刈

稻不宿飽荷戈安爾私守臣備方嚴重險先所資我思
伯紀公蘋薦終高祠恢復諒非難戎馬安足窺宋歷既
中隕公數胡云竒九京不可作百世為臣師

斗湖書屋追和雲谷雜言十首

登山

客路厭崇岡書屋依雲嶺已辦青絲鞋尋山方日永日
永更山深卧雲懷耿耿

聽風

靈籟來何方
瓊琅振林木
風颺起歛忽
青蓋寒煙覆
披豁倚匡床
聊以淨煩溽

對月

秋色日以佳
秋氣日以肅
長空出素月
大分私茅屋
顧影發清歌
舉盃寧我獨

謝客

佳客愛我來
朝會散已夕
布席方丈餘
雄辨渺何極
靜默者誰子
相過慰疇昔

問農

野人業已勤刈獲云何緩值茲秋陽驕十車不一滿安
得借天瓢擊缶歌雲漢

講學

山齋日復靜實用開昏冥探彼伊洛傳勿啟朱陸爭擾
擾欲何為方寸元清寧

懷友

愧我無獨見脩然憶同遊論說自疊疊歲月空悠悠懷

人不可見屏跡為藏脩

倦遊

遙遙萬里道今日歸狐丘眷言謝稽縛一破幽棲愁遊
人憶遊人恐對南山羞

檢書

書籤書幾過靈局夜無關有染丹青子勿厭蟾蠹殘長
物賴有此鶴文無移山

宴坐

世味嘗亦備道腴殊未厭源流各有自愚頑詎無砭秋
夜雨空齋令人發深念



東洲初稿卷十二

欽定四庫全書

集部

東洲初稿卷十三

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄監生臣許蔭培

欽定四庫全書

東洲初稿卷十三

明 夏良勝 撰

仕止隨錄

謝益殿下啓

謹啓為禮儀事伏念良勝猥以疎愚之質幸列聖治之朝西曹視察素乏明允之聲東部連銜大失否臧之職每捫心而愧臣節期碎首以答君恩屬者感時觸事拔

茹連章迹有涉於狂誣詞或犯於忌諱荷聖明曲宥芥
鉞之惟寬首領獲全編氓之次列艱危取道蒸暑兼程
攜骨肉以生還遂丘首之死所仰叨庥庇頻致問於先
期更辱多儀懼拜恩於後至顧以負譴深重卧病衰憊
安敢進列班行尚未能出門戶伏枕萬慮勉削牘冀以
陳情望庭百拜雖曳裾何以塞責有懷縷覩無任懇祈
奉陽明先生書

良勝少且賤又不肖特辱知遇汲引進之于學使知向

往感恩知己誠亦兼之以坐叔向之嫌僅能一削牘致
問左右而於汝信教紙更見齒及然時已在罪脩敬無
階嚴衢聞變取道入閩併日及廬期赴大舉尋得駿功
報矣計軍門休暇請益有地而狂愚樗散知無庸效尺
寸命僕旋止者數四不承顏色真懷古人敢布深衷以
祈曲宥而牽連時務幸俯聽焉方其逆賊肆克偵臣塞
道非義檄交馳則觀望進止未可知也君門奔奏未達
非以義制命則坐失幾會未可知也故曰凡此駿功惟

權逼成夫道至於能權斯用大矣非閣下其孰當之然
而治亂興壞誠非偶然朱子謂於亂也必生能弭亂之
人以擬其後天生之君用之故人望之向閣下有南贛
功道次侍楓山翁教謂天其有意於斯乎他鎮或當一
面斯則居高御下而連三省他則或權璫制馭或副屬
參焉斯則進退在握懋功方結主知已若逆謀待發豫
處在殿以殲之者近歸復謁又謂是在閣下當無過憂
因及夏忠靖公在文皇時仁宗在儲同漢府獵公知有

不測機穽制召還蓋一僅見用權之難可知也已今去君遠親寵如靖公未可知則在閣下之用權尤所難也今則若易為之矣所謂弭亂之人天亦啓之閣下其能以守謙而先避之與抑惟君用是承人望是副與蓋亂之克治之機也治之本是在儲貳知閣下面有敷陳斯載首簡但聞先時士大夫於此段事極欲標致題目固大議論然竟付虛談而已如宋時賢君既燭先幾並育宮中簡慧亦定如范如司馬相得為深主張國是又何

如人立論正名其難若是以今視昔數者相去何如也
况夫立草禪詔泣然下涕遽屬太子猶或改容父子間
且然固通情也嘗與二三同志漫議及此謂須默奪潛
定意可幸中敢盡布之蓋自逆瑾首亂祖制使司香日
侍親王並遣就國強藩謀逆或基於此瑾誅此制竟未
議復識者有遺憾焉前幾既失已知閣下當必使後日
無今日再失憾也然此亦非欲詭遇為獲且冀長賢與
選使彼利於昏幼者之為隱然自喪無啓亂階長治久

安庶其在此又聞往者邃翁東川既已成謀而今當柄
一二委之於卜謂得鳥焚其巢竟以中沮故又曰凡此
隱功惟斷迺成嗚呼草野罪人何敢僭妄輒及大議亶
始以楓山深望而慶閣下以必副天下功也繼以邃翁
東川之未為而期閣下以必成萬世功也閣下其亦諒
良勝所以圖報知己復何事哉不然則真棄物之先草
木甘腐閣下其初知而教者並負之矣雖死何贖大戾
干冒昌威無任悚息

東謝士潔道長

鄭村荀里地以人名廬陵故名邑而陽明公暨吾兄先
後宰治政望蔚然茲又巧值義旅並懋殊勲他日名王
謝邑未為不可避罪草莽全郡荷生成雖若子桑歌不
任聲求貧我而未得然力疾加額默有頌謝而已側聞
獻俘在即愆慙兼程事闕宗社專制在閩河陽下勞之
迹或所當避而六師在道志在罪人形弓燕饗須回馭
迺成禮節江南百萬隱功視今日為多矣甚願甚願逆

賊生致反噬肆言是在不聽昔時曹欽伏誅李文達裹
瘡投疏請釋交從人謂有見蓋安反側故事也謀深交
廣舉目皆是能一網盡之乎邪正自辨以漸驅逐國體
與法或為兩盡况夫功高難居命使後期從軍罔績忌
爭相承先備維密成勞在陽明籍勞在吾兄紀驗稽覈
其難其慎大段誰實迺是吹彈不破往者固多張大亦
或蔽蓋或濫或冒然以內有同事外無異言彼此相欺
塗抹人口今則光明俊偉事業使後人反覆索視更莫

得而瑕疵將與膚征同策以傳光奕波及何限操豚蹄
以祝所欲逾奢誠取道人笑亶情愈深者謀愈密高明
其亮之

東伍汝真道長

布衣言好亦多建立宦績可觀若吾兄秉大義奮是駿
功殿此鄉國誠不讓鎮周風力則一夔足矣敬服敬頌
罪累深重暑毒兼程入杭聞變攜家數口未敢徑投虎
吻取道入閩幸爾及舍忍辱偷生甚懼知己擯斥近叔

脩進士極道垂念故不失故有如此者感荷感荷陽明
生我邦士百世永賴家主戶祀宜也宜也鄙見謂宜少
待公車離省而後可峻功重望真世之瑞物凡有血氣
莫不保愛愛人以德此其深念如何如何逆賊所畜不
減淮南瘡痍郡邑待哺定痛奏牘轉移以代上供蠲租
之令或時請下推恩有序先其近者仁人君子寘念恒
切必蚤為之所使北軍至搜括入內竟亦莫見實用如
逆瑾所有或不下此今果安在往事明徵可慨也已可

慨也已陽明知周天下而不窮者吾兄言之宜無不濟
聖眷方隆並疏宜無不允顯望顯望草野待盡雖甘腐
木石仰澤汪濊亦生腴潤恃愛漫及幸鑒亮萬萬

平江右序

詩附

皇帝秉剛德肅將主威既外靖北庭爰議舉狩禮欲內
振汎南服敝治幾先炳若有童牛待桔制而未發良勝
輩並懜機要輒有論奏帝曰吁是咎浮蹇氏薄第于誠
雖然罔使後有拒臣言尋罷議既而有中令搜逐諸藩

使朝議洵甚咸測聖威有遏亂畧告變踵至曰是在寧
藩濠故有潛圖朋仇罔悛用底于天罰帝曰嗚呼惟我
祖宗本支周厚弗替有隆穆命大吏諭以維新未達變
已大作撫治孫公憲副許公義烈處命不渝陽明先生
專閫用鉞方取道治閩獄案幾及難變服詭行左次吉
臆決倡聲御史謝君伍君按廣還信附和一詞吉守伍
君相義方力奏檄上下徵誓屬邦君曰通於天地君臣
允義勛哉君子用懋集于大勲濠逆著狀天討必誅咸

有弗力厥均罪亦弗于貲顧譎弱不足視師惟左右君子事事若治爾私維是曰賴曰臨曰表咸守擇屬從會兵先期赴幕義聲克振申誓曰惟辟迺威何敢義制豈幾有會間在絲髮失不復得茲賴迪果毅其登于辟惟天惟帝是憲惟宗社是重曷其有于家于身鼓勇夜薄南昌城潰步伐止齊咸律克奔罔迓曰建曰信兵至曰專為犄其戍是曰撫曰饒兵至曰茲參而角其戍是麾用先登追賊江湖間諜者至曰賊濠越謀越交越偽

官屬敗潰安慶且遁至出數十里迎擊一合擒縛之以
專為未盡銳也克入南康郡俾復而宇以參為未均勞
也往撫九江郡俾正而部江右大平尋聞帝命六軍交
至祇用俘獻藉勞惟備惟慎若聚財論工制器選士政
教服習遍知機數之節選噉鋒蔡踣剗之利鏖掀撤掇
之狀筭趾披拔之機斬標楛楛之漸搏力勾卒羸越之
法獨比參伍烈火隊官曲部校禪之制誅畀曹五抽推
十一之數裒益畢陳羣能著職明堂御治封錫待及先

生方覲文匿武志戢色温若不居焉嗚呼司馬氏以不
與登封制作為有遺恨深罪膚詞明庭萬里草野致頌
亦云幸矣詩曰帝右區夏奕奕本支武穆文昭其永有
祉驕孽弗良敢犯于將天憲祖訓其刑無上主愛克威
臣威克愛不返兵刃毅爾敵愾以義形命以權制數
奏駿功克讓允濟凡師無善於古則然師善之善于今
有焉行時聲律為本為宮味色云雜還質攸同西山峩
峩西江有沱深鏡大書隱功則多于夷于襄弗蓋弗張

是屏是翰載戢用光明堂賚賜玄衮待次願以致之天子之史

祭一川孫先生文

曰公死而氣生于茲土也義無愧於君臣公生而志死于茲土也思有深於父子烈士名臣垂傳信史偉績豐報廟食永祀斯為全歸更復何俟但德公如見仰公維思儀圖實深欲擬公似羣飲自足楚江之涘初公保釐有渥其顏垂及易稔髮匪其斑心在帝室憂在逆藩郤

慮義色彙征于閑汲直云卧有沮于安信畀孔融操亦
寢奸剪若所忌眠食于難撤備九江謀夫匪臧公有抗
議宵適于航弱僕是將迺達斯章有嗑容梗而水制防
客歲憂疑公生如屍公鎮于都周星不移人惟公恃公
握有機書問致私獨壯公為公屢乞休疏詞日增亦有
簡書獨發奸萌謂活我恩與生我等斯為何言有出公
焉知言者流孔疚癩憂方側功曹與聞覆草帝心簡留
鄉國攸燾比公遂歸若水蚤閑公今即爾常山文山就

是二者孰重孰輕孰易孰難公亦何擇維耕斯穫翊運
為力式昭臣則人固知公慷慨就死是所難為良勝欲
表公從容瀕死為不易得也嗚呼公死公生大係斯世
有知者人孰不哀致豈以罪累而云義廢東望致械誅
詞從質公神如生其或自謂良慰知己良慰知己

再答德温

不見顏色真懷越世端人詩教遠及又厭一望前律謙
冲有若無氣象後力行為勝可謂兩字符矣逡巡岐路

迺不肖病根直指為藥友道近古此足占之然此兩岐
或均以適國借使陸非積學見象山集亦備許多體裁
朱非心靜或未能燭理剖析幾微如目前事也故敢斷
斷然曰二者不可偏廢且如為春為夏為秋為冬氣候
不同生長收藏為歲功又不同謂此天也彼非天也可
乎哉可乎哉竊意二公在當時已多此一段辨論是以
滋後人之惑殆恐辨愈煩則惑滋甚矣山齋懸榻何期
為高士下之面有指陳布席函文許矣

答余子積憲長書

讀性書者可以知本矣更資大訓以適於用君子之學之教斯其博哉曩歲京師面領諄誨心亦會之上下其議猶在耳茲得全本每一展誦有餘師焉固不在相與周旋而後可瞻企也往者聞陽明論學於大根本上有所見良勝嘗面析其故邵子四片朱子對待若知行體用人已而二之時或參焉陽明則每每欲混為一爾斯於一貫處為省力為大得力若以資談而踐履未到處

卻只是一場話說而已勦其說者又欲并闢朱說此大
害事非本意也定論之訂聞之矣然此本之篁墩嘗於
心經附註見之未簡特其不肯拈出作一冊子便不駭
人甚也大段道理儘是廣大極可細認譬若京師四方
八路俱可到但其主意要到而後已若入蹊徑終歲悠
悠不可到斯害已青田亦無陸子靜建安亦無朱晦翁
是則二公定論後語自覺穩稱而宏大若必欲執一說
為不可易者恐是紫陽先生於萬世道理豈能一切說

盡程氏作易傳紫陽先生作本義固不以背其師說為
議也若必以定論與朱為仇恐讀性書者又將以程為
敵已吏俗擾擾奉謝言不既惟使不吝教旨萬幸萬幸

再奉陽明先生書

日者不自分量謬有所陳荷休休與善不以為大不可
自吾邦君得面命也已既而汝信儀部使至惟濬太常
使至教亦云然顧蹇劣莫似何脩至此山谷云心親而
千里晤語大幸大幸廣昌令介拙稿一首信羣飲于河

各止于量欲名言而莫罄也塊守山齋偶聞諸帥抵省
作威駭聽雖未必盡然而鴟張矯虔機械畢露挾主威
以爭能期必得而後已隱度閭下功高天下守之以謙
而濬渾艾會之隙必有隱然消阻儒家作用所謂潛孚
者若此但俘獲在道進止維谷必遂初志是本敵愾獻
功常典也既云龍馭度江而西莫有所歸尼而旋歸迹
涉拘忌左右惟其適意先幾定見必有處之裕如而癡
憂過計竊亦思以自效而未敢蓋天下之寶當為天下

惜之况嘗側足先後乘而被其餘照者哉故與邦君商
畧盡瘁直達記室不識以為可否初舉義時宗社大計
專制閭外意也今既有命帥而閣下得撫治固守臣也
始可矯制以興師茲必得請而離任大抵權之一字固
人臣之盛美亦人臣之大忌當變則可不得已也亂既
靖斯守經時矣戒嚴屬從待于境上以避河陽坐致之
迹理道宜然六師左途還而歸之若既越境自開化自
嚴取道自徽州皆可至省形迹俱泯獻俘紀績俱屬軍

門事體憲節暫守信州且以撫循為常職俟巡轍且至
迎覲如古方岳之禮使天下復見唐虞盛典別有一段
開物成務意象古今冠絕事也彤弓宴錫其何之哉是
謂不矜莫與爭能閭下雅量然也公論昭灼萬世炳然
但彼席威以厭谿壑之欲荼戮之慘或未可知嘗聞閣
下有云甘九族之誅救一方之命不肖耿耿之懷誠亦
在此若稽覈功次諸統兵官獲送審單具在勿與成籍
維實迺是窺測不破更復何事東望拜楫無任懇惻悚

懼悚懼

謝益殿下第二啓

啓為謝恩事是月十日重荷睿慈特隆眷問顧以草衣
木食僅存喘息之餘而仰德懷恩並借鼎彝之重百拜
登受方寸維兢珍味用薦于先清貺襲藏于後載觀未
已致贊無詞磨蘚認文心畫既端於古跡賚弼惟肖丹
青分妙于化工於聖世真不可謂無全人在賢明誠足
慶為有令子良勝待罪草野莫遂禮儀遙望清光不勝

瞻戀

祭許年兄汝登文

嗚呼同年之誼易世講之則當其身而有不繫之情者
非誼也是以有進退焉憂樂係之有榮辱焉好惡繫之
又不幸而有死喪焉則哀傷繫之情之同誼之正也然
而亦有弗及知者有知而弗能致哀者迺若吾許君汝
登之死則無弗知者矣無弗致哀者矣汝登為社稷死
為綱常死死於一時而生於萬世則夫知而哀者不特

在當時同年之好已也先是一月同年有陸君汝亨者以直諫死其知而哀者猶汝登也一時清議以吾同年得人為重載閱年錄凡三百又五十人今僅一紀進退榮辱不知幾何而死喪者近十人而二先汝亨汝登而以城守死者惟郁君亮之則求所謂若而人者百人而一耳嗚呼若是乎正氣之難回而正人之不易得也若是乎養士之功深而得人之難為盛也是故人有死焉斯哀之矣哀而樂焉有不死者也有生焉斯樂之矣

自少日人言
卷十三
樂而哀焉不得其死者也夫有異事亦有異情吾殆同
汝享之死而幸生者故於汝登之奠也重有樂也亦重
有哀也誼之變也又不獨以同年之情而已也尚饗

少岷東軒以公務至省詩以叙別

趨省應兼舍離憂動幾秋蒹葭方協律風浪任虛舟李
郭驅豪聖賓僚信好仇柴荆江草夢歸訊勿淹留

名兒菊生

頑軀才脫死副館見兒生籬菊故遲放清寒稱晚名驚

人朋友望食我野夫情紙筆陶仍重卷愚坡未輕顛危
痛亦定潦倒醉方成家笥無文選基堂莫爾傾

祭圭峯先生文

君子所以不朽于死者出於言為文章見於行為氣節
然而兼之者罕矣文而可傳有正焉有奇焉各名其家
者為難而兼之者又罕矣節而可仰有甘焉有苦焉各
持其末者為難而兼之者又罕矣世之論圭峯以文者
有曰是其可知者有曰不能句讀者焉是蓋所畜者懿

而奇正並行者也以節者有曰是其可繼有曰不能測
識者焉是則所遇不同而甘苦時出者也嗚呼此世之
所以多一節自全而全人之所以難免於今之世也雖
然疊石為嵩非不崛然奇也疏泉為池非不瑩然潔也
然而有山焉莫不有也雖惡木無擇焉而不害其為高
有海焉莫不委也雖汙流不拒焉而不害其為深此圭
峯所以曠一世而以文章氣節名者信其能兼之而不
朽也於死又何憾焉顧天子將待以為賢輔相而莫究

于用縉紳倚為善類而僅足以自全海內以為名儒而未淪于教鄉曲後進經師人師奉遺言以周旋而莫知所之也是則憾之憾者也

別孫明甫

江城春意動童叟擁君行水鏡推先得桑麻慰後生船迎青入好鋤發劍爭鳴佳麗雄今古應諧吏隱盟

萱堂祝壽卷壽懷英母八十

壽母安輿坐擁籃菊泉新釀舞兒甘百年五分今過四

一念終從信有三南國汎舟風自遠北堂樹草夢方酣
祝詞歲歲追流輩婺女星高雪滿簷

明處士樂芸方先生墓誌銘

歛之方為黥侯裔姓由東鄉徙潛口凡十一世有樂芸
處士處士諱思憲字廷儀大父怡庵公仕官至湖廣按
察僉事進階亞中大夫曾大父永進公以怡庵貴贈如
其秩父中和公承志任家遺二弟以逸趾美在仕處士
業舉子且成又欲任中和公勞公難之然而服賈行止

與之俱諸勞無避遊吳越歷青齊徐魯入廣經粵必挾
冊以隨旅次瑣瑣不廢業物與景會時發詠歌有詞人
風致染濡益深出語言必根據章章可聽履道擇地端
雅道人翼翼起敬移褊性日就平曠倜儻檢束冠裳類
儒素依仿古義事必力為之不遺也若嘗為主家兒盜
金二百餘亡主不自容處士慰諭之兒獲費已十二不
復究遇貧有喪則施施亦不苟去居里許甃石橋以利
病涉人德之題於楣曰種德里里中有張睢陽祠處士

以為是稱祭法範金為爐以示崇祀於道得遺必待亡者至一少婦也歸之婦哭謝曰非公則恐致私人疑為姑棄必死公生妾也無以報籲天而祝曰願君之後如君之先處士娶歛之許惟嗣孔艱娶濟之李連館並育許生紀通紀迪李生紀齡為通長紀達為迪幼孫男四曰復登復升復庸復闕孫女三詵詵荐祉未艾也紀齡輩克任子職處士安于家築樓儲書以樂芸自命示不忘于初紀達能終斯志登丁丑舒芬榜進士凡誨他兒

輩曰惟勤惟儉惟世斯家吾席先君之遺終以義勝不
克有餘獲僅僅淡泊自足而已紀達初官南豐令命之
曰慎爾官惟承先大夫休紀達周旋惟謹蒞官三月政
成民頌之以聞公赴解官去余卧病山中介狀至祈以
銘石余方以鄰邑得治為喜而遽以奪去為憂哀惻不
已次狀如前云者則知南豐之政有所受處士誠讀書
者志斯有徵也烏可辭公生正統辛酉八月九日没正
德己卯冬十二月六日享年七十有九歲葬于闕所是

為某年月日銘曰人曰讀書或不識字芸齋膏馥句句
是事莫匪克學而匪克仕售不主獲義爾孔肆如琳如
琅在簾在笥琢而璞而惟適所自有待封君有徵處士
亨之弗盡以貽于嗣

五谿訪余山中用朱陸鵝湖韻識別一首

野袍翻起路人欽會處慙慙別處心景入殼中休杖屨
道存眼底見雲岑榻懸齋閣蛛蟻合舟並滄浪鷗鷺沉
謾說鵝湖成妙境直留踪跡到于今

用前韻柬竹亭一首

入山高仰若為欽
觀物眼眶求道心
未信青藜真到海
直看黃鳥止于岑
白生虛室月仍好
霜落寒江水漸沉
契誼十年三日別
孤村烟雨似非今

五無隱巖卷

人生一氣化役物俱紛紜
胸中故大虛過者如浮雲
既隱亦既壽終焉蔚聲聞
巖高溪流深獨甘溪上芹

奉和陽明別詠一首

孔孟已不作障柱迴波翻遺簡秘魯殿搦筆窺文園老
虛天竺寂訓詁紛多門韓歐伎倆資佔畢濂洛尊下學
莫有擇漓俗何由敦大哉孰嫡傳小子無前聞愚頑亦
稟性天地匪喪文緣絕攀華巔斷港窮河源汨沒二十
載刈葵傷迺根潰恣恍有覺易簡思避繁陽明闡道教
心慕足已奔馬黃厯塊影舟葉兼朝昏展拜臯比溫直
是洙泗原與人無棄瑕衛道若守藩格物開衆諒良知
翁獨存大同異自息魚躍鳶斯騫度內亦廖廓眼底忘

輕軒來遲莫自咎去亟莫自云得師更得友立德斯立
言失心循周行踏駒無僨轅登舟順逆風居行如共論

南郊

十日再出郭秋清風氣涼遠山凝帽碧晚稻拂衣香謝
病留蟾裏閒遊問蠹蕪襄野人幽惻久來徃意蒼茫

望軍峯

軍峯峯高盱江鎮天立封界南豐州此時開幕迎相識
他日看雲恨懶遊四度經行今放蕩百年吾道幾滄洲

垂陰積雪秋空暮白鶴飛來最上頭

夜懷少岷

明府幾殊衆如公絕代人
梧高入標格眼孔隔風塵
藉占科名並年來道義親
劍光共清夢悲壯任吾真

懷沔泉

少府論才輩風枝上出林
連驂瞻日近細話幾更深
遠道知全力荒村得好音
浪尋安樂地未信打乖吟

南豐喜遇朱少府

別駕留參郡權符百里勞詩豪如水部賢館適江臯致
治須君輩閑行任我曹歸來尋舊約走馬沒蓬蒿

過平西謝余宗器

跨邑三百里兼程兩日行瘴氛晨起靖更漏夜分明戚
里隨兒稚交游問友生何當賢令尹披豁幾多情

夜至寧都

天空鴈影過遠遊信所之崎嶇歷世路久近成交期封
井亦萬家越境迺於茲導從似嚴警列炬焚高脂蔚豹

幾經變招鷹如待飢放轍適所往痛哭庸何追懷人坐
雲涯且寘盈筐思反側不成寐翻引兒曹嗤

問十八灘

千金戒垂堂胡為冒險絕葦航抗急流深黑渡沉鐵橫江露
齒齟破谷驚坼裂前招與後掉迎風度層雪漢封赤丘
荒韓王峙岡列豪傑古則然壯心胡為折天弧信可彎
旄頭近微滅莫問皇恐灘掩淚肝腸熱

至虔見陽明先生

道教推先覺，朋簪半舊知。
經營心在帝，俎豆化行兒。
懸鏡分秦士，醇醪醉習池。
根蟠只方寸，生意萬千枝。

喜見東郭太史

遠別意每惻，應知會面難。
冥鴻脩翮健，書札墨痕乾。
朝籍我初謝，山盟君未寒。
道門推老將，何意並登壇。

喜竹亭同館

短榻懸頻下，柴荆信有光。
摘蔬供小案，沽酒過低牆。
入眼饒秋色，填胸賦雪堂。
道腴津液滿，分潤到枯腸。

懷五谿

孤節人爭識，高名世不羣。也知舒醉眼，猶自愛溪雲。
對月真千里，今秋又一分。書郵隨地得，客枕鴈聲聞。

謁濂溪祠

營道巖通月，虔州夜告天。相知惟久好，鑒識至今傳。
遺像鬱孤嶺，中分章貢泉。何當賣書籍，移屋住東邊。

登清獻堂

聞道西安老，知君不有家。官衙惟飲水，世事等搏沙。
保

愛留棠樹侯王學種瓜
雙江流不盡空拜浪頭花

登鬱孤山

摩頂瞻天碧穿鞋
沒草繁崑崙接雲氣
几席認河源煙
屋家家火風林處處
村買山錢辦未許
放小蓬門

謁江東祠

幽人欲灑泣何地著
新亭石氏江東古
文山天外青樽前

師奏凱

王總戎主
席故云

史占德門星行路
每如此閑雲高卧
垆

登通天巖

誰持天斧使破此杳冥間安得六丁士移當萬里關霞
飡頻到足雲卧懶知還借我蒲團地心齋見孔顏

坐忘歸巖

人寰亦可闔適意每忘歸許大開曾次艱關入翠微林
霏風雨暝石磧馬牛稀為問桃源奕何人是解圍

問鬱孤臺

臺前遺構古臺上零草多地與撐孤柱天分鎮兩河碑
文春蘚蝕酒甕晚煙駝對酒甕山故云恠我曹騰眼衰遲亦浪

過

東郭夜宴言別

斯遊非草草吾道正寥寥
惜別歸何處留連似此宵
春風壇潤雨野色水分橋
夢裏山陰興文江信未遙

別宴投壺

宴射古為樂還輸老将家
劍垂腰欲重花插帽初斜
枉哨謙謙語觥籌處處詳
忽傳南過鴈蕭瑟淚胡笳

坐臨江寺

徒倚方亭午那知是別時
山花迎坐咲江鳥喚船遲
物色元無主鑪錘信有私
掃開荒寺壁待我為留詩

少岷令兄還瀘江作岷峨行贈之

吾聞古梁州岷峨天下壯
險阨絕未奇丹青詎能狀
磅礴運無常期更迭霸氣誰爭王
硯礪異物未足當殊才輩出神迺
降峨眉秀發嘉州雄蘇門趾美萬夫望
老翁秃筆如杠長小者近質大者放
文章氣節蓋世稱我山童童岷山抗
氣化有疾徐鈞陶自消長岷山故號青

城山神仙窟宅迷罔兩曾君兄弟岷山人填曾拍塞岷
山上少岷長安同看花我以罪廢君麾仗大岷南來幾
月許醇醪一醉迂踈喪歸寧老翁瀘江濱翁亦放歌驚
佚蕩老泉軾轍信足方岷山峨山適背項近聞峩山又
蔚葱氣蒸迺發胡爾誑安子清雅識面蚤程子敏達光
吾榜徐子抱節迹偶似三高堂肖三峨象山川有僻契
誼深便當附君尋火長青城山幾萬丈仙人今有亡踪
跡亦恍恍憑君借取飛空杖大張眼目開溟蒙莫問岷

峨更童莽

九日以園橘薦少岷少岷遺以栢釀侑以詩歌
和而答之

丹入楓初下青傳橘蚤來蘇家奴更長楚客頌幽懷供
給酸辛共勻圓刀尺裁野人芹意久先到習池隈

又青橘行

荒郊風氣日瑟瑟長有青梧短有橘梧子落落威鳳來
剖橘欲擬天台窟天台仙子鋤青冥題封鳥獸難為匹

牽裾濡露穿絲鞋不辭筋力供盤實使君清格出郊島
騰驤每縱追風逸洛中未信獨樂名笋青蔗白還堪劈
襄陽霞綺添秋容禽鳥得意何啾唧也知老圃不足學
獨守黃花莫相失願分滴潤起枯槁花外來車有餘苾

題南山巷

達人幽意足何處大觀分秋色樓頭好南山朝暮雲

名二兒蓮生

青青池中蓮既花亦既實芳時嫡冢生喜走狂落筆文

山谷正人卷十三
卷十三
山名道佛豚犬安足匹神骨豈無種抱送那有術陶令
且嗤五汾陽應顯七我亦何所遺篋書園芋粟登堂試
兒啼云是家英物

饒行齋訪余斗湖再宿而別有詩和以贈之

君久欲忘世我行方晦時已能絕矰繳附翮冥鴻飛種
秫亦可釀幸赴同襟期山陰罕公事胡爾薄兒癡

費子和太史寓臨川望南城有所思以詩見問

和答一首

好鳥拂高樹野鹿便林垆走鋌失阻險食蒿維故坪巡
狩古則然黃澤道已清眇余顓蒙資輔和口舌騰南風
吹江蘋北斗依春城保茲首領歸安避翫醜名故人不
遐遺伐木懷同聲眷言夙好敦別意春花冥日暮望天
際雲影蒼蒼生

五老蟠桃圖詩叙

正德庚辰陽月九日吾友陶子沔暨清率從子相明輩
為母太孺人八十壽先是有遺五老蟠桃圖者茲展于

堂而縣之宗黨若隣若婣若友若門下士若諸所來往
咸登拜壽母既旅以陳載笑以觴善禱以頌有歌者曰
惟天生人有欲斯室惟人葆靈壽斯無易若斯五老蟠
斯渥斯瞳炯以碧人而僊而世茲多厯聖善如母嗣之
無斁又曰粵海有桃有爛其霞孰懷其核孰見其華既
實爾蒼式薦式祉樂綏以無涯聖善如母樹斯于家於
是倚而和者未已也東洲子發焉後至聞之繼以文曰
夫有異數亦有異徵其是也夫吾聞廬山之陽有五老

峯者山也茲則肖之人已又聞瑤池之上致蟠桃者王
母也茲則移之老已夫山壽物也高岸陵卑岸谷也人
亦先天之始後天終焉山乎若斯壽歟桃僊實也陽木
之精也制斯陰姤其遇老乎從類也嗚呼若是哉固以
壽男徵也而壽母焉故或以為異也而非也母亦有丈
夫若陶孺人者乎方大理公守官時相無瑕公綜家政
外有承志無瑕視諸季如已或避羸也內不聞逆言教
諸子克學沂官訓導不及祿而蚤以文名洙沒而遺詩

可誦汚以靖恭滋殖而懋清負竒器期取上第待所適
而用也婦而孝而順嫠而善教是可繼而傳者丈夫懷
內愧也容肅髮僅垂領齒自固味嗜酸苦夜能紉針綴
日勞紡絡有壯婦不任而安安也重裨陰訓稟陽剛也
有敬姜之遺教已乎敬姜方績文伯退朝請逸而戒之
曰朝夕處事猶恐忘先人之業是以保祀家之壽也推
而大夫朝以考職晝以講政夕以序業國之壽也諸侯
朝脩業命書考國職夕省典刑天下之壽也壽母之庭

有邁文伯之志者敬姜之教其行遠乎哉斯之為壽山
若耶斯老若耶見斯桃之花實已耶茲圖固有未盡言
也茲言固有未盡意也或曰陽德方亨之徵也嗚呼陶
子其將有所遇乎所以壽母者又在斯乎

明故舒野江先生墓志銘

正德十五年己卯冬十月良勝執友舒殿謨芬使從虔
整迎尊翁野江先生就養于今官福建市舶蓋謫居也
道次盱江許良勝謁于舟強致館穀款語溫溫而容肅

止循而幅尺良勝輩與殿譔偕以言罪則手額曰慶朝
家有若而臣吾家不意復以芬為子也式壯茲履以考
于祥則曰生乙亥三月二十有一日齒與先大夫若盡
然涕下一似重有感也先生留崇朝去去益顧思與殿
譔官京師每有資勵則欲推本而宗先河後海而今斯
慰矣殿譔汲汲以忠直遂于天下利于友而不有于家
于身必曰嚴君之教則然而今斯徵矣明年庚辰冬十
月殿譔見星而奔舍則聞先生以又八月十二日終矣

良勝弔于行慟夫涕之有從也殿謨哀不任聲蹠指狀授則稽制以十一月闕日葬于某所志之役也嗚呼禮有微情未之能也以故興物則有與焉其能已乎先生世胄華而遠國以為姓隋唐間自東陽四遷而居今進賢梓谿之墟凡三世有聞士曰澹然翁生梅坡學名通儒不易仕生東臯治經明農屹樹鄉望生霜筠孝節著稱而施溥先生霜筠子也席世風教浚之蠲潔以葆于懿植之茂朴以脩若能搜逖探抉離龐導滯宿工老師

下氣會事私有易名咸稱曰野江云然自蔚勿施而盡於殿謨焉是授以迪以厲時逸而維字畫攻苦動罔非彝克敷于受出其緒與良勝同丁卯舉丁丑擢進士第一官翰林脩謨忠鯁駿發明年諫北征極陳天理人欲之辨良勝方釋禫至諭及者猶慄慄危之暨西征良勝諫之繯守待罪決旬不報又明年南巡有詔清道殿謨與良勝輩爰度會諫疏涉激犯機禍不測約以後死者傳殿謨因出先生手書拜且誦則首曰身許于國不必

念家嗚呼訓言藥石聽者忘痼荷聖明曲宥殿譔調提
舉福建市舶良勝除名並舟而南濟值姦變途梗殿譔
不獲省視匿跡之官踰時難靖迺獲迎先生就旬日祿
養良勝瀕死家食獲侍教以寸晷詢問來徃咸以為越
世事俛仰幾何遽罹斯戚戚斯痛痛莫為詞愛斯錄錄
舉其要若茲以德世家惟孝之終况以遺於後無已事
君維忠之難况不有其子故凡喪而有備祭而有敬宗
仁而有叙孝之推也急于病讓于夷圖人而忘已衆和

而辨友信而益順而服役以無負上忠之餘也穆宣連類允憲于時涉筆應銘法所逸多矣先生名法字本制配聶氏內則稱理生子芬生長女適何珍次適李浙舉庚辰進士芬子泰質亦不凡而學聘王氏孫女二長適徐曰敬次許樊某銘曰粵也無罇人則為罇秦也無廬人則為廬七世之胤可以觀舒德而華胄有與無與壯哉斯邑爰名進賢受魏其大兆斯名焉邑而責實舒氏以旃玄成小同議禮于紛再世其逢並為德門齊侯嗜

味易子迺至吳亦有鈎兒靈絕技委子事君曷如野江
隱忠之至曷如野江生于世世

明故吳立齋先生墓表

撫之隱君吳立齋先生以正德己卯七月朔日卒于莪
原里居逾月孤子漢淳輩葬于里之楊公塘循士制也
逾年庚辰冬十一月南城夏某迺克脩詞以表于墓誠
後期已某少事先生是何敢後顧嘗讀先生垂絕作志
氣格若壯夫當盛時語歷歷素履不出幾百言曲中節

度蓋美而自張任勞而若悔歎歎以孝弟大節未厭于
心約為銘詞嗚呼孝弟堯舜之道也聖賢之所以為學
為教在是自天子以至公卿大夫所以為治本在是中
國人類與夷狄禽獸別者在是先生所以師表于鄉而
某所以圖表先生之墓者舍是何以哉是故有難言也
言之難得無後乎雖然天下不可一日無若而人則不
可一日無若而言也惟其不可無固有欲專而有者執
塗之人而議之曰非孝人也非弟人也其不拂然去以

怒者幾人也對家之人而譽之曰若孝人也若弟人也其不懽然受以順者幾人也是孝弟要道又顯名也獨避而不居人之性端使然哉先生之學必有以深知極驗夫性分之真盡人力之能為而終不以為天倫之絕德是以恒不滿假氣微漸盡而耿耿未忘有如是者或曰先生素任師道閔夫蒙養弗端彝倫攸斁故考終之名自居不趨將以屍教如史魚之意歟若然則先生非獨一世師也將有若成人之衰於子臯者知所以學而

教也中國居人倫叙堯舜之治其有望乎故曰蒙以養
正聖功也先生之墓不有思弔望而表之者乎雖越世
猶今也而何以後云

擬遊青原山詩和惕庵用陽明韻

軀殼亦云重疇能委飛埃少壯走絕險一日還幾迴昔
聞青原山高宿寒雲隈沒跡慕蕪合異境菲林開扶輿
行淑氣森蔚多名材鍾物亦冥合造化良餘哀懷人志
丘壑整履凌岑崖披豁如有私騰突緣無階穹窿樹棟

極收拾次桶櫬杖屨虛丈席老大悲沉埋霜寒肅孔道
清風來遠垓穩抱麋鹿資勿啓猿鶴猜馬頭分滴潤枯
槁回根亥生涯厭谿谷足願供盃衰頽即荷鍾汝爾
無分骸草弱忌先翦栢勁知難摧山陰不盡興雪舫終
相陪矢心華袞衣輔頰空喧虺嚴君故近瀨於陵安足
畦每勞締袍念而與前人偕山犬不吠聲曲徑無人來
酒債未可了文逋真避催雲樹日杳杳撫膺更徘徊

秋興八首和惕庵用少陵韻

朱夏才驅羽扇功
綸巾高岸此窩中
枕移竹外疎零雨
步向江邊御好風
天入釣蓑來並去
地開蓉帳白連紅
窮簷匹馬勞知舊
何處鹿門尋老翁

鳳騫時下覽清暉
多病衰遲氣息微
滿屋月光人未見
入雲高樹鳥驚飛
杯乾鄰近還堪借
菊落籬荒肯暫違
過眼勲名試看鏡
一人柴骨幾人肥

踈影依稀獨自斜
敢云野服亦多華
閑行收拾惟青史
遠眺依稀見使槎
悵望燕臺連北極
也知蔡女弄胡笳

于今茅屋堪供老，細雨疎林晚戴花。

鏡兒隨地是長林，壯士分髯倒戟森。
拔劍舞筵饒索笑，荷鋤澆菜補層陰。
水洲瘦薄才收粟，鷗鷺浮沉忌有心。
擬欲破愁愁又積，一聲殘角幾聲砧。

曲中人在畫中山，千里丰神杳夢間。
平路幾何知退步，畏途應笑問艱關。
若教神物能移檝，相對溪山自厚顏。
採藥問童何處路，莫疑曾鑷鬢初斑。

失着從前是局碁，倒奩國手轉增悲。
征輦未厭瓊花觀，

仙仗初旋止輦時去國路長歸欲蚤懷居懶解起多遲
何當小坐巡簷笑半夜月明千古思

茅庵移傍灑西頭梧葉先機動蚤秋為活賣文長乞米
不須登閣迥生愁徑開草色喧眠犬地到泉聲盡起鷗
蕭瑟鄰家吹笛恨錯傳丹極是揚州

獨上山城更逶迤曾驚風浪入山陂四郊青燐陰房火
九月黃花故國枝締薄耐風思蚤換床低對月好頻移
邯鄲忽見連城返方信迴谿翅未垂

蓮峯林居詩和答惕庵并寄蓮峯

買山欲峩峩乞湖清淺波村深過客避林下故人多秋
嘯月盈把寒憎雨透簑有時尋舊約相對一高歌

浮朴山居靜真焚學士魚石開斜雨迎藤蓋負暄廬扶
病須憑藥安貧却富書閉門風味別脩吉正威如

慣狎稚兒語而聞長老風摘蔬供夜客掃葉破煙籠望
重斗之北力迴川又東柴荆圖久住物色已非儂

僻地開幽勝荒郊遠鼓輦霧深知豹隱水薄認狐疑調

合時聞曲窮來更拙詩所交無賦客不待好風吹

拂衣頻掃石處處為留雲舊結蓮峯社移名鄭子村夜

深還對案日午未開門何處山陰舫搖搖破夢魂

神聖真當御車書統一家狂奴憂未歇田父欲逾賒白

石煮糜爛桃源流飯麻市兒驚帽折爭送插簷花

易拔深更燭開械遠使詩兒童聞候語顏色慰相知鶴

病能隨主鷄殘可畏犧長安消息好局面幾番碁

廣昌縣城記

建治郡也所隸廣昌則巖邑也邑巖而民負保力而汰
施客作日繁奇技業如趨市盜之誨也童子時聞廣昌
令死于盜建守以累謫去及壯聞盜縛令質而要利以
歸既仕而聞盜歲再至或再歲至凡七歲六至如歸也
令或遁或敗血或憤怖死輒寢報為常官民居蕩析斯
燼掠藏如囊破囚械蹂躪故案籍盡燔之是故民旦夕
毋忘備至失寢處羈僕于隘若烽堠然賃舟輿艤息岸
谷謀有警則舉屬梱載翩而下已盜故驅而墟也民咸

胥怨莫適居故凡令受符則邇盜區區懷紱不離寢瑣瑣迹若寄旅不終日去郡亦視他屬少解督令巡閱使者每寘之外境十不一至若為安之而矯虔用滋腴削甚民用以困輕徙以避役鬻業如恐不售貸倍子母甘之若是而謂廣昌於建為難治邑可也皇帝御天下之七年副使胡公永清專符靖盜迺蒞治爰咨士庶以茲故咸曰邑莫城非守資也日磔民于市歲易令有固志哉銳志城之郡選于倅之良曰趙子鴻遠董治勸相期集

而竣亟雨潦至壞道孔殷崩墜罕完雉順德張子景川
調至恃民固故弗治盜窺而動警嚴景川以家徇民不
易守盜果弗至民有曰是弗勞勞亦安止婺源余子宗
器繼之政既通民有孚若巡堞而惻迺曰因敝以葺費
省且半恃民久懼亦有玩請于撫治暨諸路復完城之
盜斯息民用是輯保于業以尺寸計持貸券者愧不能
出手逋而乞歸者幾百戶有曰若忘勞勞以逸只君子
曰先民有言令若流水以喻順也民初城勞疲矣繼督

而治懼弗堪也故若景川弗城也曰良民稍裕依而固
矣因之而城克有濟也故若宗器城之曰良是若鄭國
以寬曰治以猛曰治順故也聖人作易重門擊柝有取
諸豫豫順以動也天地如之況城邑乎是完城之謂也
王公設險守國有取諸坎殘邑之守非重險乎是初城
之謂也易有贊卦凡十一時義首豫時用首坎皆曰大
矣哉則廣昌之城而圮圮而完自七年經始歷今十有
五年工迺訖工非細故也馬學諭光具功狀介黃生選

揭生琛走謁東洲夏子記之贊之遺也亦曰廣昌繼今而民益裕盜益遠翕然稱治邑吾建斯為全治郡矣

賀饒君克明五十嘉慶序

夏子曰年非君子所尚也而有不容易視者焉君子斯尚之已言非君子所重也而有不容易立者焉君子斯重之已故夫柳氏子跖舉藏如毛以壽稱也五朝更事榮名備焉長樂馮生老矣猶夫盜也若是永年斯蔓戾也而盡謂其年足尚乎談天如行雕龍如爽炙轂輅如

髡若是夫游言斯禍賈也而盡謂其言足重乎然則君子之年而奚若孔氏有訓曰志學曰立曰不惑曰知天命曰耳順曰從欲不踰矩視諸履者詣諸理也曰幼學曰弱冠曰壯有室曰強而仕曰艾服官政曰耆指使曰老而傳曰耄曰悼曰期頤辨於識者御于氣也然必以十年為節考于大成也夫如是而年有不尚者乎君子之言而奚若曰若臧孫氏之言立上以德德維其懋次以功功維其豐視諸為陶唐氏御龍氏豕韋氏唐杜氏

以保姓守祊者為不朽已夫如是而言有不重者乎吾友饒君克明聞孔氏之訓舊矣年五十而蔚然有聞鄉之彥而名立言者若兩山張子言之曰季也擇而隣而媼也徵其愛也曰允哉惇乎信可依已依以立國而况家乎白憲鄭子繼言之曰其先方伯公有嘉政流其澤也曰美哉颯颯乎有所本也本厚而滋其益有植乎石泉陶子又言之其外氏有所知其內有所相其子有所承也曰思深哉善斯備矣不羸于躬貽其後以豐未可

量也吾復何言哉惟曰三子重言者也克明其因以考于成也哉聞益遠矣其在並生而識者將祝之曰天慙遺老成式是典刑其永有生未及識者將於言是徵想見斯人若將施揖遜於班荆者矣因同以不朽也嗚呼若克明之年斯其可言也夫斯其可尚也夫

贈廣昌令余君宗器考寔叙

鄉先正南豐先生謂今之守令有道而聞四方者不過數人過此數人有千里者相接而無一賢守有百里者

相繆而無一賢今豈惟古之世為然哉余邦守以賢祠者自國初厯今纔四人列邑多賢令而有道以聞見名人著稱者於椒丘得南豐令衡君岳於一峯得新城令陳君員韜而已若是乎天下得人之為難而君子知人之欲盡也若是乎守令近民易知而難能也況夫守賢矣而令之相承者不相直也令賢矣而守之相成者不相直也幸而直之而名人言立而信以傳者不相直也是故澤有滯而不究守以為病志有壅而不行令以為

病言有嗇晦而近誣知人得人恒以為病而守令以有道聞者益罕也余每有憾于是而近則私致慶焉邦守少岷曾公以有道聞者也蒞郡凡三年而列邑之令以賢而相承並濟于成若廣昌令余君宗器其可徵也已居常於民事有所可否少岷輒稱之曰無尚同焉及與之協襄大慙無所於避少岷又稱之曰無鈞異焉茲已及考期例以最書少岷隲括贊與若不能盡詞殆欲引而同歸焉是以監司信之宣使信之撫巡院又信之功

狀上天官可必信之宗器翕然有聞于四方也已嗚呼
維蠶有績蠨亦有匡維范有冠蟬亦有綏維守則賢而
令多有聞宗器于是信有真也顧余言未足信傳若椒
丘一峯者人將有惜夫宗器猶未真也雖然方今儒雅
彙征思以得人知人將無若南豐者乎數人之列其可
居也宗器之真者有在也四方相聞而興則守令之能
於官而知者益衆余之言自宗器立斯其慶獨私於郡
邑乎哉

建昌府儒學明倫堂記

先帝御極五年分殿益封卜惟建食周廣如制府儒學
在縣內于時孔殿遷佛宮明倫堂遺構樹于殿西先撫
治見素林公提學二泉邵公嘗降觀而慨息曰使堂于
東於西為勝以工頻重弗果庚正德乙亥殿以震壞新
之越三年戊寅貳守何君先推官羅君繼請于撫治一
川孫公提學水南田公新作明倫堂如往哲議郡守曾
君至雅重文學時萃士舊堂以講因以易名通守陳君

朱君推官危君並相于堂暨齋序以次成面峙鱗屋齒
齒且近購地數武廣基而高屏之是為庚辰十月南城
夏良勝舊學士也與觀厥成堂負阜窿然而高若宸斬
榴燔翳嘉樹蔚發若有異氣陰而相之前以布翼以俯
居則以奧視曠如也端屏屹立無傾無仰若蔽履焉撓
棟敗垣冗雜遁去列坐而縱目羣峯畢至而前引類相
向廣大高明足以象夫士之所欲造焉迺進博士弟子
役良勝載以訓詞夫建山水勝郡也郡之勝斯又最與

然而山水依天地有也天靡有秘地靡有移人靡有所
避而沉埋於佛氏徒灌莽蔬畦迨幾百年幸而學宮當
之又以倉卒弗審莫要其會興念經營而寢阨者又十
餘年震以易殿遂庚斯堂堂成又再逾年而後屏刪刈
危歌疣贅諸忌而會于勝是固天有所啓地有所待人
有所法而足遺豈偶然哉楊子謂通於天地人之道曰
儒堂以居儒也三才會貞善學者必有直之況夫勝出
于佛入于孔學之闢邪崇正其如是者于東則勝西則

否學之去惡遷善其如是者勝而累弗有也屏斯全已
學之汰雜而歸純其如是者嗚呼道參三才而一也一
則純純則善善則正正則王王則孔氏之道也否則雜
雜則伯伯則邪邪則惡惡則佛氏之道也故學之始也
離而二於堂得之斯可已學之終也歸于一于屏得之
斯可已君子之教躍如也善學而直斯會者知所從已
則吾邦先儒往轍可追夫豈遠乎哉

辛巳歲首謝益殿下啓

自序四庫全書卷十三
為禮儀事竊惟歲事聿新元氣更始仰聖德深厚曲賜
生全荷宗正仁賢特殊賚錫良勝譴重有徵報稱無地
質方蒲柳自今更衰一年靈望海山效祝再呼千歲日
為千秋節故云為此具啓稱謝以知

和巽厓記遊詩十首

送梓谿舒太史同宿舟次

信宿占星史浮槎替午橋夜深三昧語人在幾層霄去
住元無繫漁樵信有招侵晨南北路送眼去遙遙

石門別梓溪

野寺懸崖古行舟過鴈清見時真夢蝶別恨欲調鷺錫
類能忘我思君可輟羹滄州何許路蚤晚有人行

拜金潭墓

擔重道且遠多君足自支璧完奮垂翅龍卧近天池乘
雪興復淺置芻人自知潭深月色靜孤釣短蓑披

留宿巽厓

迂徑碧迴澗高楓丹雨花吾廬非抵鵲君袖認青蛇白

雪調應合畦蔬味自賒兒童識衣帽驚笑惱田家

卷十三

楊源卜築

楊子一世士談經半畝開籬荒初爛菊牆缺可舒梅佳
兆習初卜高軒此後來命童頻掃石深勒破殘苔

登潭山

大觀凌絕嶠起敬酌芳泉毛骨爭奇異扶輿自亘縣重
登疑白眼萬選入青錢淳朴真吾適孤懷別在川

宿西林寺

跡異便孤嶼心閑入妙香村深雲與宿月小夜分涼名
姓愁多識文章覬後藏坐闌相對語誰與問穹蒼

自女冠山麓過福源

大麓經重嶺長溪通曲池青鞋扶短杖白氎稱疎籬村
落農談老牛羊牧笛兒只綠幽興遠相向欲追隨

宿郭仙峯

磴滑長疑兩山高不礙雲破愁桑落酒重念鶴移文短
燭話方細賡詩夜已分羽流矜重錫天語尚紛紛

坐七星泉

石竇飛泉雨星光問夜何山靈愁我到異境逐人多竹
月隨留迹松風起浩歌洗心應更約一歲幾相過

訪梓溪太史夜叙出楚江卷見石江歐陽太守
之作次韻二首

江迴遲孤棹天涯問故人榻先高士夢門候小僮親會
面真看鏡論心幾岸巾抱琴重訂約莫厭往來頻

花雨欲迷逕溪雲爭逐人分尊千里約坐竹十年親雪

調高瑤瑟風儀並角巾
沉沉春漏下燭跋已更頻

登西山桃花嶺謁楚江先生墓次明水韻一首

我昔佩名劍于今高掛墳
白牛千古夢青草一丘雲
眼底江山異尊前主客分
賣書移屋住猿鶴省移文

歸訪五谿宿台峯書屋志別三首

坐我台峯下時登會景樓
春深即吾境雨暝失虛舟
餉諧初約追隨識舊遊
山陰有餘興風雪未教休

別台峯憲副

金史四庫全書 卷十三
抄選南金士留當北塞關霜茄懷簡在月笛老驄閑兵
甲龍圖少烽煙朔漠間一行鳴鴈唳詩共故人刪

別林二山僉憲

江奔隨夜漲山壁倚秋晴老稚迎車雨交親候法星宦
情忘馬耳劍氣逼豐城會面頻書札滄洲虛草亭

贈何少府獻最詩

聖朝優吏治少府次名流綜覈才歸漢棠梨已蔽周雲

舍江湖夢

沔泉母夫人垂白于堂得便省之

月巖琴鶴遊

巖在道元公居之元公佐

清獻于度晚益相孚涉泉關
郡公亦有然者歸游過斯巖得無興思已乎
望中丹極

近風获入行舟

楊氏緝義序

夏子以罪歸斗湖每有道黎川楊自謙氏繼其先樵拙
君為義事者昉社倉之遺度存鄉學之名也夏子每信
之義之或曰矯也夏子曰夫矯非俗也矯以厚俗其可
也或曰專也夏子曰專非義也專以成義其可也繼而
吾友巽厓子手一卷為自謙作者於制為詳於言為益

信也夏子矍然曰夫黎自其鄉有所謂楊氏倉者無窮
餓以居者已自其鄉有所謂楊氏學者無怫戾以迷者
已使郡邑盡夫黎也使夫人而盡欲為楊氏也則天下
無弗養者已無弗教者已政化之成之漸也自謙其圖
以終之而又期于後以永其先也故併題其端曰緝義
云

陳蘭坡先生墓志銘

正德丁丑五月十有六日新城陳蘭坡先生卒于廬時

在迺翁梅軒府君憂次繯經未嘗釋也邑之人至易肆
會弔之檢其畜僅僅為斂具以某年月日墓于仙居劍
閣後山之麓亦從儉制時東洲夏子當郡書館持筆書
之曰孝廉吏也每哭之然不及臨之為歎于懷也戊寅
復官京師已歿以言罪罷歸當寧藩逆變取道閩嶠次
新城警方嚴望墓而拜之弗成弔也嗣子楠杖跣以趨
跽以請先人幽石尚虛亦有遺言必立言如君子迺知
知而言以信倉卒可之然未有以應也又再逾年楠請

不已夏子亦自愧念於先生為知且久斯其言亦後已
而可隱乎先生諱衮字廷章生天順辛巳二月八日至
成化丙午與先大夫同舉時年尚少而器局若老大動
必以古道律令大夫亟許而契之形聲相倚若出一人
南北來往輒與俱同大學試亦往往聯名上等厯事內
庫中官有欲延賓塾不就大夫是之屢厄于部試進業
不休至危疾不易志壬戌歲上選部考拜天台令清泊
自甘政務省費息民台故僻以驛雇直協濟寧海台

日通孔道輸若故奏請省歲幾千斛歲饑則緩賦以粥
飼無告者俗賤女生輒不舉以將迎侈故痛治之得以
禮制俗漸易里胥籍記女活千餘咸曰陳母生也楊氏
婦節行久逸則表之追祀宋令鄭公有遺惠示吏師也
當道以才可繁薦調青田縣治故弊公理如發蒙然民
有號陳一刻喻敏才也幾閱月以母王宜人憂去再起
定海定濱海田日廣鹵率民治之以阜利俗火葬則置
義塚先之治行益著擢知儋州儋淪夷也先生一以禮

教為治先立社學擇師儒聚鄉子弟而教之維救維篤
新文廟立東坡祠風以動焉出俸餘贖戍卒鬻婦償公
廩者夷亦感革漸知有方因展覲成禮懇乞以解官終
養銓司重違之會以望擢汀州府同知得便省為安職
恒為當道選治他郡邑汀之民每恨不得專而有也所
治獄牒如蝟其大者汀有窮饑衆發富民粟官以盜論
先生曰彼饑迫爾豈真盜乎出之漳有訴婦以毆姑當
大逆承劄訊獨疑之廉姑有中篝辱忌婦不能同者狀

卒辨之人方期先生嚮用以享生人愛人者報竟以梅
軒喪毀而弗起已新城令蕭兩湖惇古吏治動必度考
志載叔于成績以先亡者又酌民言歸士議請于巡院
以鄉賢祀之是則先生所以終也先生曾祖文義以鄉
行高人謚曰廉靜於今云稱祖木齋與梅軒俱隱德若
祖父配余氏內則維恪生子楠楠生煥以某年月日納
銘于墓銘曰士有文也行或違焉者矣行也政或滯焉
者矣政也終或異焉者矣終也久或泯焉者矣先生於

是其亦有所遇矣其亦有所本矣

聚德堂記

同年執友曾君少岷奉尊翁朴夫先生暨太夫人于合江故廬以奧為安安斯樂樂自生也壯而遊宦四方而親之思日以遐遐斯逸逸斯遊遊斯曠已曠惟瀘之汶水西壩為適然不當欲以其所也會少岷以京朝官領吾建昌郡寄懇疏使省因得徙居而新作之中為堂名曰聚德是謂承志孝之上焉養固下矣左右序以居昆

弟無異宮也以居羣子姓有同業也以會友朋日以磨厲以輔于未逮也堂以後為閣以讀以燕休也東洲夏子曰君子居也成其身以成其親不過乎其物也君子居也求弗固弗固於午情則微矣作弗累弗累於矯情則微矣名弗外弗外於過情則微矣且聞瀘之無方民曰欲居我而親歡心焉可以興孝也欲居我而昆弟翕焉可以興弟也欲居我而子姓仁焉可以興慈也欲居我而朋來以麗澤焉可以興學也學則聚之所也聚則

類之歸也易曰物相遇而聚故受之以萃於是方士者彙至咸曰人亦有言惟萃爾德達于政將以身人之身親人之親長人之長幼人之幼友人之友也夏子建人也諗少岷之政於建有然者愼乎天下可沾也是故孝者德之本也政所以達教之所生也相在爾居式昭于則彼懸衡而奚若欺以輕重者為難陳繩墨而奚若枉以曲直者為難設規矩而奚若汨以方員者為難君子審德而聚誣以色莊者為難固有登堂而教可知也

詩曰孝子不匱永錫爾類此之謂與

尤溪縣儒學田記

石江歐陽子守延平郡逾年郡無遺使部院才之奏調
福州郡東洲夏子觀善友也每於所善入閩則欲聞石
江所以政者善於石江自閩出則必能致所欲聞者或
曰家并植治於賦平已或曰爾官爾反爾內爾來弗疵
也於獄良已或曰鴟義矯奸今以其師於戎法已或曰
翼嚴祭法淫則毀於祀正已或曰生生以庸無牯牛馬

於野殷已或曰闢塗以導氣折閱寔損於市和已政之
凡也既而尤溪令曾確甫列疏徵詞祈以表石江建置
為學田若干畝他邑稱是郡學倍焉其議則上于巡使
下咨令其出則汰諸佛徒之羨之良其規畫度支則義
田之遺制也夏子曰有是哉立教也政之本也而議者
恒弗及也夫政者正也教者效也效於天地而同於山
川而異於人情而易從也守令勸學而益公餼以田亦
本之人情已乎延平於閩壤為行而尤溪為沃壤沃則

多產多產則厚殖厚殖則居逸居逸則教弛教弛則學
落落而斂斂而畜畜而久而復華故君子當其會乘
其氣振其動而有所教也殖于公將以奪其所私從于
欲將以反而求理貨惡其非所入也不必出于已澤欲
其流于遠也不徒徼于近學欲其因心而感也不責以
易其能是故君子之政猶家也定賦以為之端折獄以
為之柄治戎以為之紀脩祀以為之器治農以為之徒
通商以為之畜然必立教以為之田也故曰人情者聖

王之田也獨郡邑稱治云哉

元年二月之望余北舟次龍山梓谿太史方舟
叙別歷鄔子晚泊牛山理屐登之各賦一律用
昉古人處贈之義

晚飫湖山望夜連詩畫船風隨客子便月共故人圓煮

茗真忘味

梓谿出鄔子
茶亦名品也

開尊欲尚玄

余亦出
姑泉也

會難愁別

易來徃鴈聲傳

再辱梓谿贈言和答一首

君南我北此江干兩鷓開頭只恁難出處無心時破格
經綸有仗會當關魚羹久負非溫飽鳳竹虛垣直夜寒
屈指于今一年強長安生菜共盤飧

計明年此際梓谿亦當就道故云

舟行晚興

風景春來好晴江深自流放船鷗戀狎過眼霧全收疎
懶長家僻行藏付道周村醪添醉臉愁對晚山羞

過餘干送陳伯度僉憲之任廣右

南嶺宜人地相傳只桂林雲高萬里外雪下幾分深

嶺南

少雪獨桂林
有觀雪樓

江路尚羣醜朝家望好音春明門自近未

信白頭吟

安仁道中

暝色依依暮長溪舟自行草汀迎迴碧桃岸照殘明散
帙忘吾事題囊仗此生北山如在望春夢更多情

弋陽道中寄謝王巖僉憲

聖詔還遺直君應最選人澄清舊標格道路拜風塵詩
律窮添細心期遠自親柴局勞訊約孤劍倚春晴

桃花灘

午上桃花灘不見桃花瓣春藏塢轉深波惡石交濺削
岸恐隨流倚壁當垂練畏途傳好聲倦鳥安枝戀

名三兒桂生久未有作弋陽舟中式汪氏諸賢
之廬因有所感補書之

山齋移桂來才高三尺強九月涼風深金粟爛秋爽入
門驚異香物瑞誇里黨三郎生及時竒骨漸以長吳生
已畜刀斫桂手須放故物未足多聊以慰時望有子更

多賢懷抱終為暢

登叫巖寺

天斧為誰琢骨奇
故教靈秘待明時
巖花向我憎饒笑
何處登高浪賦詩

又次甯庵韻一首

野寺饒春江閣迴
鶴驚飛錫總人間
天遺好境若為主
地借時名可是山
丹極頻煩歸老相
白雲留住住僧閒
小駒也信非空谷
何日懸車更往還

惜花

何事愁翻蝶垂牆萬朶花東皇開翠幄仙女試丹霞縱
酒探深甕行邊問小車擔頭挑未盡春色亦搏沙

傷柳

去家十日許看柳幾分新別惜懷居好傷多逆旅春病
貧妨召命棲迹敢全身惆悵官河上殘枝蚤送人

草坪驛次後峯壁間韻

破帷疲馬冒風塵山色依然不世情郵卒殷勤供館穀

只緣曾識幾番人

卷十三

又次一川孫中丞一首

年來舞袖任郎當萬頃波濤一葉航
豈謂色絲忘袞闕
祇應狂態笑人忙也知拱日窮朝暮
何處遊雲辨白蒼
前輩風流今未遠是誰籩豆許同堂

一川以節死廟食于江右故云

黃鵠山同薛尚謙論學

殊方何地着幽思黃鵠山堂習靜資
石壁相輪還說塔
柳枝春蠶各名絲論心有幾逢高士
舉目應知自得師

更上層樓迎送目鳶魚飛躍本無私

已卯秋余以罪罷歸又聞逆變途梗與筠溪黃
子執別三衢悵如也茲余赴召命而黃子方視
學相見歡甚感賦一律聊以寓情

昔年此地別今日此地逢君教及委巷我行如轉蓬寄
迹本為異論心何大同幾別更幾逢相向驚老翁

蘭谿同筠溪拜楓山老先生之柩歸而哭之

旄頭歲晚犯奎星可是斯文失法程漱水往年尋杖屨

楓山今日拜銘旌

朝廷有典方隆道天地於儒豈妬名幾尺衣兒藏稿未
桐江煙雨見湘衡

筠溪文學贈詩和答一首

別遠道路長無由見尺素殊方各孤迹一地為再晤

始別

於衡今會
於衡也

絕學追聖賢冥搜入典故人生愁別離轉轂

成朝暮吾皇坐明堂登韶下武護胷中抱幽奇前席何

時吐

錫山追和二泉先生見贈詩韻

才脫朝簪旋製巾不須折角也驚人一朝風采當全盛
萬乘驅馳敢惜身山水有懷應借重滄洲吾道本來真
衢尊江使通吳楚分到麻姑一味春

潤州丁卯橋庄

善養樓

細雨潤山閣浮煙隱古城江湖自憂樂俯仰答承明尺
五須先輩丹青付後生白雲留不住蚤晚赤霄行

見山

避俗陶翁好門深逐逕斜青山如隱岫當戶入人家
慢卷風移柳籬疎霜戴花夜深蒿祝望北斗是京華

看竹

問訊渭濱竹移來旋補林吟風清瘦詠欺雪本虛心得
養遺時宰頻過見逸賓傳經亦心事餘幌度流螢

迎暉

戶牖通暘谷時來炙背暄朴忠歸尚赤大老隱逾尊風


落潮聲盡月孤燈影存歡顏動寒士處處有陽春

觀稼

幽風歌晷漏王業幾艱難大命符真主先農對穆顏江
南春雨足省北畫圖班鰕菜志歸老羹醪省藥闌

邃翁拜存問之恩志感有作即席和之

舊相新恩雪半顛圭懷投老亦多年江南物色歸時望
極北勲名正尚賢帝顧草廬應紀後人知司馬更無前
丁寧節使還歸命百拜登嘉咫尺天



東洲初稿卷十三